

# Na Cailleachan

le

RUARAI DH MAC THÓMAIS

*Crùbte an so fo'n an t-sian,  
'S air chùl nam balla tha cumail na gaoithe air ais.  
Oirlich de thìm bho na sparran,  
Tha iad 'nan suidhe, ri comhradh  
Air crodh 's air daoine,  
'S ri cur fàd air an teine,  
'S an sìleadh 'na ghlaodh dubh a' dlùthadh.*

*'Se foghar fiadhaich a rinn, i  
'S tha'n coirc 'na laighe;  
Cha tainig iasg an diugh—nì ach an sgadan:  
Sgadan saillte 's buntàt, buntàt is sgadan.  
Chan eil nì ri dhèanamh ach fàd a chur mu'n an teine  
Is bruidhinn air crodh 's air daoine.*

*'S tha'n sìleadh 'na ghlaodh dubh a' dlùthadh  
A nuas bho na sparran,  
A nuas bho'n an tughadh;  
Is feumar as t-earrach an tughadh a sgaoileadh 'na thodhar  
Air an talamh-buntàta,  
'S cha tainig iasg an diugh, nì ach buntàt is sgadan.*

*Dad ach a' bruidhinn air crodh 's air daoine  
'S a' cur fàd mu'n an teine—  
O shaoghail, is goirid do chuairt 's is lom an cridhe,  
Is tana an sgàile, is dlùth oirnn nìmh an fhuaraidh.*